

**PEMILIHAN SISTEM PERBANKAN ISLAM DALAM KALANGAN PENGGUNA
MUSLIM DI TERENGGANU: SATU CADANGAN KAJIAN DALAM KONTEKS
GELAGAT KEPENGGUNAAN ISLAM**

AHMAD AZRIN ADNAN

Pusat Kajian Pengurusan Pembangunan Islam (ISDEV), Pusat Pengajian Sains Kemasyarakatan,
Universiti Sains Malaysia, 11800 Minden, Pulau Pinang;

E-mel: ahmazrin@udm.edu.my; **Tel:** 04-6532910; **Faks:** 04-6570918

Tahap Pengajian: Ijazah Doktor Falsafah, Universiti Sains Malaysia.

Pertambahan bilangan institusi perbankan Islam di Malaysia telah menyediakan ruang kepelbagaian dalam urusan perbankan. Ia membolehkan setiap individu memilih institusi perbankan Islam yang paling mampu memenuhi segala keperluan perbankannya. Bagi pengguna Muslim, kriteria pemilihan sesebuah institusi perbankan Islam sepatutnya bertunjangkan kepada pertimbangan syariah. Walau bagaimanapun, tidak ternampak adanya garis panduan tersebut untuk diamalkan oleh setiap pengguna, khususnya individu Muslim. Setakat ini, penumpuan lebih terarah kepada usaha penambahbaikan kemudahan infrastruktur operasi dan institusi berbanding pengguna. Dalam pada itu, kajian tentang kriteria pemilihan bank Islam di Malaysia secara keseluruhannya dilihat masih lagi kurang. Apatah lagi di Terengganu yang majoriti penduduknya adalah Muslim. Selain itu, Terengganu merupakan satu-satunya negeri di Malaysia yang cuba melaksanakan konsep Islam Hadhari dalam sistem pemerintahannya dengan slogan 'Islam Hadhari Terengganu Bestari'. Oleh yang demikian, amat menarik untuk melihat apakah kriteria yang mendorong pengguna Muslim di Terengganu memilih sistem PI? Apakah realiti gelagat kepenggunaan semasa pengguna Muslim di Terengganu selari dengan gelagat kepenggunaan Islam berikutan penerapan strategi Islam Hadhari? Kertas kerja ini berhasrat membentangkan satu cadangan kajian untuk meneliti kriteria pemilihan sistem perbankan Islam dalam kalangan pengguna Muslim di Terengganu dan menilainya dari perspektif gelagat kepenggunaan Islam. Hasil penelitian ini diharap mampu mengemukakan satu garis panduan dan kaedah umum berkaitan kriteria pemilihan bank mengikut acuan dan kerangka Islam. Di samping itu, ia memberi gambaran sebenar gelagat kepenggunaan semasa pengguna Muslim di Terengganu. Seterusnya ia dinilai dan dirumus keselariannya dengan gelagat kepenggunaan Islam.